

Rješenje
po Prijavi koncentracije privrednog subjekta „Market AS“ Ljubo Simić s.p. Gradiška,
Ljevčanska b.b. Gradiška

Sarajevo
August, 2022. godine

Broj: UP-02-26-1-011-11/22
Sarajevo, 05.08.2022.godina

Konkurencijsko vijeće Bosne i Hercegovine, na osnovu člana 25. stav (1) tačka e), člana 42. stav (1) tačka d), a u vezi sa članovima 12., 14., 16. i 18. Zakona o konkurenciji („Službeni glasnik Bosne i Hercegovine“, broj 48/05, 76/07 i 80/09), rješavajući po Prijavi koncentracije podnesenoj od strane privrednog subjekta Trgovinsko ugostiteljska radnja „Market AS“ Ljubo Simić s.p. Gradiška, Ljevcanska b.b. 78400 Gradiška, zaprimljenoj dana 25.2.2022. godine pod brojem: UP-02-26-1-011-1/22, na 108. (stotinuosmoj) sjednici održanoj dana 05.08.2022. godine, donijelo je

R J E Š E N J E

1. Ocjenjuje se dopuštenom koncentracija na tržištu maloprodaje pretežno prehrambenim proizvodima, pićima i duhanskim proizvodima na području opštine Kotor Varoš, koja se odnosi na sticanje većinskog vlasništva i sticanje kontrole privrednog subjekta „Market AS“ Ljubo Simić s.p. Gradiška, nad privrednim subjektom „Kvimpex“ doo Kotor Varoš, po osnovu preuzimanja 100% udjela.
2. Obavezuje se privredni subjekt „Market AS“ Ljubo Simić s.p. Gradiška da uplati administrativnu taksu u iznosu od 5.000,00 KM (pethiljadakonvertibilnihmaraka) u korist Budžeta institucija Bosne i Hercegovine.
3. Ovo Rješenje o koncentraciji se upisuje u Registar koncentracija.
4. Ovo Rješenje je konačno i bit će objavljeno u „Službenom glasniku Bosne i Hercegovine“, službenim glasilima entiteta i Brčko distrikta Bosne i Hercegovine.

Obrazloženje

Konkurencijsko vijeće Bosne i Hercegovine (dalje u tekstu: Konkurencijsko vijeće) je dana 25.2.2022. godine pod brojem: UP-02-26-1-011-1/22, zaprimilo Prijavu koncentracije (dalje u tekstu: Prijava), podnesenu od strane privrednog subjekta Trgovinsko ugostiteljska radnja „Market AS“ Ljubo Simić s.p. Gradiška, Ljevcanska b.b. 78400 Gradiška (dalje u tekstu: Market AS ili Podnosilac prijave), koja se odnosi na sticanje direktne kontrole nad privrednim subjektom: „Kvimpex“ d.o.o. Kotor Varoš, Cara Dušana 18, 78220 Kotor Varoš, preuzimanjem 100% udjela u ovom društvu.

Podnesena prijava nije bila kompletna, te je na zahtjev Konkurencijskog vijeća od 13.4.2022. godine, i odobrenja produženja roka za dostavljanje potrebne dokumentacije od 26.4.2022. godine, prijava dopunjena uz podnesak broj: UP-02-26-1-011-6/22 od 13.5.2022. godine.

Konkurencijsko vijeće je, u skladu sa članom 16. stav (4) Zakona o konkurenciji („Službeni glasnik BiH“, broj 48/05, 76/07 i 80/09) (dalje u tekstu: Zakon), objavilo u dnevnim novinama Obavještenje o dostavljenoj Prijavi (akt broj: UP-02-26-1-011-7/22, od 30.5.2022.godine), u kojem su objavljeni podaci o koncentraciji, te su pozvane sve zainteresovane strane na dostavljanje pisanih komentara u vezi provođenja iste, što se u predviđenom roku nije dogodilo.

Konkurencijsko vijeće je u smislu člana 30. stav (3) Zakona, izdalo Potvrdu o kompletnoj i urednoj prijavi broj: UP-02-26-1-011-9/22, od 03.08.2022. godine.

Podnosilac prijave je naveo, u smislu člana 30. stav (2) Zakona o konkurenciji („Službeni glasnik BiH“, br. 48/05, 76/07 i 80/09) (dalje u tekstu: Zakon) da je prijava podnesena samo Konkurencijskom vijeću, s obzirom da učesnici koncentracije ne obavljaju svoju djelatnost izvan Bosne i Hercegovine, niti imaju povezana društva izvan Bosne i Hercegovine.

Iz podnesene Prijave moguće je utvrditi sljedeće činjenice:

Prijava namjere koncentracije je podnesena u smislu i u skladu s članom 16. stav (1) Zakona.

1. Učesnici predmetne koncentracije

Učesnici koncentracije po predmetnoj prijavi su privredni subjekti: „Market AS“ Ljubo Simić s.p. Gradiška, Ljevčanska b.b.,78400 Gradiška, kao podnosilac prijave, te „Kvimpex“ d.o.o., Cara Dušana 18, 78220 Kotor Varoš, kao ciljno društvo.

1.1 Privredni subjekt „Market AS“ Ljubo Simić s.p. Gradiška

Privredni subjekt „Market AS“ Ljubo Simić s.p. Gradiška, osnovan 21.6.2002. godine, upisan je u sudski registar Okružnog privrednog suda u Banja Luci pod brojem IV-1056, u 100% je vlasništvu fizičkog lica ¹(..)**.

Pretežna djelatnost ovog privrednog subjekta je trgovina na malo u nespecijalizovanim prodavnicama pretežno prehrambenim proizvodima, pićima i duhanskim proizvodima (šifra djelatnosti 47.11), koju obavlja u 19 maloprodajnih objekata na području opština Banja Luka, Gradiška, Čelinac i Kotor Varoš.

1.2 Ciljno društvo „Kvimpex“ d.o.o., Kotor Varoš

Privredni subjekt „Kvimpex“ d.o.o., Cara Dušana 18, 78220 Kotor Varoš, upisan je u sudski registar Okružnog privrednog suda u Banja Luci pod brojem: 1-8151-00, u 100% je vlasništvu fizičkog lica (..)**.

Pretežna djelatnost ovog privrednog subjekta je trgovina na malo u nespecijalizovanim prodavnicama pretežno prehrambenim proizvodima, pićima i duhanskim proizvodima (šifra djelatnosti 47.11), koju obavlja u 8 poslovnih jedinica na području opštine Kotor Varoš.

2. Obaveza prijave koncentracije

Obaveza prijave koncentracije privrednih subjekata, u smislu člana 14. stav (1) tačke a) i b) Zakona, te člana 2. Odluke o načinu podnošenja prijave i kriteriji za ocjenu koncentracija privrednih subjekata („Sl.glasnik BiH“, broj: 34/10), postoji ako ukupni godišnji prihodi učesnika koncentracije ostvareni prodajom roba i/ili usluga na svjetskom tržištu iznose 100.000.000,00 KM, po završnom računu u godini koja je prethodila predmetnoj koncentraciji, i da ukupan prihod svakog od najmanje dva privredna subjekta učesnika koncentracije ostvaren prodajom roba i/ili usluga na tržištu Bosne i Hercegovine iznosi najmanje 8.000.000,00 KM, ili ako je zajednički tržišni udio učesnika koncentracije na relevantnom tržištu veći od 40,0%.

Prihod učesnika koncentracije za finansijsku godinu 2021., kao godinu koja je prethodila koncentraciji, ostvaren na nivou Bosne i Hercegovine, iznosi kako slijedi:

Podnosilac prijave, Market AS, ukupan godišnji prihod iznosi: (..)**.

Ciljno društvo, Kvimpex doo, ukupan godišnji prihod iznosi: (..)**.

¹(..)** podatak predstavlja poslovnu tajnu

Finansijski pragovi, definisani članom 14. stav (1) tačka b) Zakona, pod kojim postoji obaveza prijave koncentracije, nisu ispunjeni.

Međutim, s obzirom da učesnici koncentracije, prema podacima dostavljenim u prijavi, ostvaruju više od 40% tržišnog učešća na relevantnom tržištu, smatra se da su ispunjeni uslovi obavezne prijave predmetne koncentracije u smislu Zakona.

Naime, na osnovu podataka o ukupnom prometu na relevantnom tržištu (promet evidentiran preko fiskalnih kasa u Poreskoj upravi Republike Srpske), ostvarenom u 2021. godini, po osnovu predmetne djelatnosti učesnika na istom, procjenjuje se da su učesnici koncentracije imali sljedeće tržišne udjele:

Podnosilac prijave : **29,66 %**
Ciljno društvo : **40,03 %.**

Po osnovu ukupnog broja maloprodajnih objekata na relevantnom tržištu, učesnici koncentracije imali su sljedeće tržišne udjele:

Podnosilac prijave : **2,40 %**
Ciljno društvo : **19,00 %.**

Konkurencijsko vijeće cijeneći navedene podatke, ocijenilo je da učesnici predmetne koncentracije ispunjavaju uslove predviđene članom 14. stav (1) tačke b) Zakona, te da je postojala obaveza prijave koncentracije u smislu člana 16. stav (1) Zakona o konkurenciji, što je ispoštovano od strane Podnosioca prijave.

3. Pravni osnov i pravni oblik koncentracije

U podnesenoj Prijavi, podnosilac kao Pravni osnov za predloženu transakciju navodi Ugovor o istupanju člana društva i prenosu udjela u osnovnom kapitalu (..)**.

Namjeravana koncentracija se dakle odnosi na sticanje većinskog vlasništva i sticanje kontrole nad privrednim subjektom "Kvimpex" doo Kotor Varoš, po osnovu preuzimanja 100% udjela od strane fizičkog lica (..)**, koji je isključivi vlasnik Privrednog subjekta „Market AS“ Ljubo Simić s.p. Gradiška, odnosno Podnosioca prijave, (..)**.

Nakon prenosa vlasništva nad udjelom, ciljno društvo Kvimpex, nastavlja sa svojim poslovanjem, bez bilo kakvih prekida i promjena u poslovanju, pod istim poslovnim imenom.

Slijedom navedenog, pravni oblik predmetne koncentracije jeste sticanje kontrole nad privrednim subjektima, putem kupovine većine udjela osnovnog kapitala, u smislu odredbi člana 12. stav (1) tačka b) pod 1) Zakona.

5. Pravni okvir ocjene koncentracije

Konkurencijsko vijeće je u postupku ocjene koncentracije primijenilo odredbe Zakona, Odluke o utvrđivanju relevantnog tržišta („Službeni glasnik BiH“, broj 18/06 i 34/10), te Odluke o načinu podnošenja prijave i kriterijima za ocjenu koncentracija privrednih subjekata („Službeni glasnik BiH“, broj 34/10).

6. Relevantno tržište koncentracije

Relevantno tržište koncentracije, u smislu člana 3. Zakona, te čl. 4. i 5. Odluke o utvrđivanju relevantnog tržišta, čini tržište određenih proizvoda/usluga koje su predmet obavljanja djelatnosti na određenom geografskom tržištu.

Prema odredbi člana 4. Odluke o utvrđivanju relevantnog tržišta u proizvodnom smislu, relevantno tržište obuhvata sve proizvode i/ili usluge koje potrošači i/ili korisnici smatraju međusobno zamjenjivim, pod prihvatljivim uslovima, imajući u vidu posebno njihove bitne karakteristike, kvalitet, uobičajenu namjenu, način upotrebe, uslove prodaje i cijene.

Prema članu 5. Odluke o utvrđivanju relevantnog tržišta, relevantno tržište u geografskom smislu obuhvata cjelokupnu ili dio teritorije Bosne i Hercegovine na kojem privredni subjekt djeluje u prodaji i/ili kupovini relevantnog proizvoda pod jednakim ili dovoljno ujednačenim uslovima i koji to tržište bitno razlikuje od uslova tržišne konkurencije na susjednim geografskim tržištima.

Konkurencijsko vijeće je uzelo u obzir navode iz prijave da predmetna koncentracija ima efekte na teritoriji opštine Kotor Varoš, na kojem oba učesnika koncentracije obavljaju istu djelatnost maloprodaje u nespecijalizovanim prodavnicama pretežno prehrambenim proizvodima, pićima i duhanskim proizvodima.

Podnosilac prijave, u svojoj maloprodajnoj mreži koju čini 19 poslovnih jedinica, na području opštine Kotor Varoš ima jedan maloprodajni objekat.

Ciljno društvo ima maloprodajnu mrežu od 8 poslovnih jedinica, koje su sve na području opštine Kotor Varoš.

Slijedom navedenog, pod relevantnim tržištem predmetne koncentracije, Konkurencijsko vijeće je utvrdilo tržište maloprodaje pretežno prehrambenim proizvodima, pićima i duhanskim proizvodima na području opštine Kotor Varoš.

7. Analiza tržišta koncentracije

Konkurencijsko vijeće analizom podataka i relevantne dokumentacije dostavljene uz prijavu koncentracije, utvrdilo je da na području opštine Kotor Varoš, posluju ukupno 43 trgovine na malo pretežno prehrambenim proizvodima.

Konkurenti podnosioca prijave su brojni samostalni poduzetnici, tačnije rečeno njih 25, od čega 23 sa po jednim maloprodajnim objektom, 1 poduzetnik sa dva i 1 poduzetnik sa tri maloprodajna objekta, te 6 društava sa ograničenom odgovornošću i to: Klimenta doo, Slavuljica Petrol doo, Mikro-Vita doo, Fructal-Trade doo, Tropic maloprodaja doo i Mercator BH doo. Znači da je pored učesnika koncentracije, na relevantnom tržištu prisutan 34 poslovna objekta konkurenata, odnosno privrednih subjekta, koji djeluje na tržištu maloprodaje pretežno prehrambenim proizvodima, pićima i duhanskim proizvodima na području opštine Kotor Varoš.

Podnosilac prijave na području opštine Kotor Varoš ima jedan maloprodajni objekat, što predstavlja **2,4%** tržišnog učešća u odnosu na ukupan broj maloprodajnih objekata na relevantnom tržištu, dok Ciljno društvo ima maloprodajnu mrežu od 8 poslovnih jedinica, što predstavlja **19,0%** tržišnog učešća.

Nakon koncentracije, tržišno učešće učesnika koncentracije na relevantnom tržištu u odnosu na ukupan broj maloprodajnih objekata iznosio bi **21,4 %**.

Prema podacima Poreske uprave Republike Srpske, dostavljenim uz prijavu, na području opštine Kotor Varoš, ove 43 trgovine na malo pretežno prehrambenim proizvodima (uključujući i učesnike

koncentracije), ostvarile su ukupan promet u 2021. godini u iznosu od (..)** (promet evidentiran preko fiskalnih kasa sa uračunatim PDV-om).

Podnosilac prijave je u okviru svoje jedne poslovne jedinice u Kotor Varoši u 2021. godini ostvario ukupan promet u iznosu od (..)**, dok je ciljno društvo Kvimpex ostvarilo promet, u svih osam maloprodajnih objekata zajedno, u iznosu od (..)**, te se procjenjuje da učesnici koncentracije, po ovom osnovu, prije koncentracije imaju tržišno učešće od:

- Market AS – podnosilac prijave - **29,66 %**
- Kvimpex – ciljno društvo - **40,03%**.

8. Ocjena koncentracije

Konkurencijsko vijeće je analizom dostavljenih podataka, u smislu člana 17. Zakona, ocijenilo da je u smislu strukture relevantnog tržišta, na istom prisutan veliki broj učesnika, odnosno da se radi o konkurentnom tržištu.

Naime, prema zvaničnim podacima same opštine Kotor Varoš, procjenjuje se da ova opština broji cca. 27.500 stanovnika, na 14 km² naseljenog područja, te se može smatrati da na ovako naseljenom geografskom području, postoji znatan broj maloprodajnih objekata u smislu relevantnog tržišta, odnosno značajan broj konkurenata na tržištu maloprodaje pretežno prehrambenim proizvodima, pićima i duhanskim proizvodima.

S obzirom da se namjeravana koncentracija odnosi na prenos članskog udjela jednog fizičkog lica na drugo fizičko lice, nakon čega će Ciljno društvo nastaviti sa svojim poslovanjem, bez ikakvog prekida i promjena u poslovanju, pod istim poslovnim imenom - Kvimpex, Konkurencijsko vijeće cijeni da koncentracija neće imati negativan uticaj na položaj učesnika u konkurenciji, odnosno na stvarne i potencijalne konkurente.

Također je ustanovljeno da ne postoje ekonomske, pravne i druge prepreke ulaska na relevantno tržište, što potvrđuje i broj maloprodajnih objekata, (njih 43) na relativno malom geografskom području, koje obuhvata relevantno tržište predmetne koncentracije, te da učesnici koncentracije neće moći djelovati u značajnoj mjeri nezavisno od stvarnih ili mogućih konkurenata, kupaca potrošača ili dobavljača i na taj način ograničiti ili spriječiti efikasnu konkurenciju.

S obzirom da će učesnici koncentracije, po osnovu jednog kriterija - ukupnog broja maloprodajnih objekata - odnosno broja stvarnih konkurenata na relevantnom tržištu, nakon provođenja koncentracije imati zajednički tržišni udio u iznosu od 21,4%, ali će prema drugom kriteriju - ostvarenom ukupnom prometu - imati 69,69%, Konkurencijsko vijeće je ocijenilo da se može smatrati da isti imaju dominantan položaj.

Međutim, u skladu s odredbama Zakona i člana 4. Odluke o definisanju kategorija dominantnog položaja („Službeni glasnik BiH“, br. 18/06 i 34/10), dominantan položaj koji privredni subjekti imaju na relevantnom tržištu, nije zabranjen.

Zabranjena je zloupotreba dominantnog položaja po kriterijima iz člana 10. Zakona i člana 9. Odluke, u smislu djelovanja privrednih subjekata koje za cilj i posljedicu imaju isključivanje konkurenata sa tržišta ili “zatvaranje“ tržišta potencijalnim konkurentima, odnosno ograničavanje ili narušavanje efikasne tržišne konkurencije.

Konkurencijsko vijeće po službenoj dužnosti, kontinuirano vrši monitoring tržišta u Bosni i Hercegovini po oblastima privrede, kao i monitoring djelovanja i ponašanja privrednih subjekata sa tržišnom snagom ili visokim tržišnim učešćem na pojedinačnim relevantnim tržištima, te u sklopu svojih nadležnosti ocjenjuje postojanje povrede odredbi Zakona u smislu narušavanja konkurencije.

Analizom podataka i relevantne dokumentacije, te nepobitnih činjenica u predmetnoj koncentraciji, Konkurencijsko vijeće je ocijenilo da predmetna koncentracija ne sprječava, ograničava niti narušava tržišnu konkurenciju na relevantnom tržištu u smislu Zakona.

Imajući u vidu navedeno, Konkurencijsko vijeće je odlučilo kao u tački 1. dispozitiva ovoga Rješenja.

9. Administrativna taksa

Podnosilac prijave na ovo Rješenje, u skladu sa članom 2. Tarifni broj 107. tačka d) alineja (1) Odluke o visini administrativnih taksi u vezi sa procesnim radnjama pred Konkurencijskim vijećem („Službeni glasnik Bosne i Hercegovine“ broj 30/06, 18/11 i 75/18) je dužan platiti administrativnu taksu u ukupnom iznosu od 5.000,00 KM u korist Budžeta institucija Bosne i Hercegovine.

10. Pouka o pravnom lijeku

Protiv ovog Rješenja nije dozvoljena žalba.

Nezadovoljna strana može pokrenuti upravni spor pred sudom Bosne i Hercegovine u roku od 30 dana od dana prijema, odnosno objave ovog Rješenja.

Predsjednik

Nebojša Popić